



宮闈典第八十九卷

公主駙馬部列傳七

隋 安成長公主 下嫁竇榮定

按隋書竇榮定傳榮定扶風平陵人也父善周太僕季父熾開皇初爲太傅榮定沉深有器局容貌瓌偉美鬚髯便弓馬魏文帝時爲千牛備兵周太祖見而奇之授平東將軍賜爵宜君縣子邑三百戶後從太祖與齊人戰於北邙周師不利榮定與汝南公宇文神慶帥精騎二千邀擊之齊師乃却以功拜上儀同後從武元皇帝引突厥木杆侵齊之并州賜物三百段襲爵永富縣公邑千戶進位開府除忠州刺史從武帝平齊加上開府拜前將軍欽飛中大夫其妻則高祖姊安成長公主也高祖少小與之情契甚厚榮定亦知高祖有人君之表尤相推結及高祖作相領左右宮伯使鎮守天臺總統露門內兩箱仗衛常宿禁中過厨迴初平朝廷頗以山東爲意乃拜榮定爲洛州總管以鎮之前後賜縑四千匹西涼女樂一部高祖受禪來朝京師上顧謂羣臣曰朕少惡輕薄性相近者唯竇榮定而已賜馬三百匹部曲八千戶而遣之坐事除名高祖以長公主之故尋拜右武侯大將軍

上數幸其第恩賜甚厚每令尙食局日供羊一口珍味稱是以佐命功拜上柱國靈州刺史未幾復

爲右武侯大將軍尋除秦州總管賜吳樂一部突厥沙鉢略寇邊以爲行軍元帥率九總管步騎三

萬出涼州與鹵戰

闕二

於高越原兩軍相持其地無水士卒渴甚至刺馬血而飲死者十有三三榮

定仰天太息俄而澍雨軍乃復振於是進擊數挫其鋒突厥憚之請盟而去賜繒萬匹進爵安豐郡

公增邑千六百戶復封子憲爲安康郡公賜繒五千匹歲餘拜右武衛大將軍俄轉左武衛大將軍

上欲以爲三公榮定上書曰臣每觀西朝衛霍東都梁鄧幸託葭莩位極台鉉寵積驕盈必致傾覆

向使前賢少自貶損遠避權勢推而不居則天命可保何覆宗之有臣每覽前修實爲畏懼上於是

乃止前後賞賜不可勝計開皇六年卒時年五十七上爲之廢朝令左衛大將軍元旻監護喪事賻

繒三千匹上謂侍臣曰吾每欲致榮定於三事其人固讓不可今若贈之重違其志於是贈冀州刺

史陳國公諡曰懿子抗嗣抗美容儀性通率長於巧思父卒之後恩遇彌隆所賜錢帛金寶亦以鉅

萬抗官至定州刺史復檢校幽州總管煬帝卽位漢王諒構逆以爲抗與通謀由是除名以其弟慶

襲封陳公焉慶亦有姿儀性和厚頗工草隸初封永富郡公官至河東太守衛尉卿大業之末出爲

南郡太守爲盜賊所害慶弟璉亦工草隸頗解鍾律官歷潁川南郡扶風太守

樂平公主 周宣帝后

按周書宣帝楊皇后傳宣帝楊皇后名麗華隋文帝長女性柔婉不妒忌帝後昏暴滋甚喜怒乖度嘗譴后欲加之罪后進止詳閑辭色不撓帝大怒遂賜后死逼令引訣后母獨孤氏聞之詣閤陳謝叩頭流血然後得免帝不豫詔后父入禁中侍疾及大漸劉昉鄭譯等因矯詔以后父受遺輔政后初雖不預謀然以嗣主幼冲恐權在他族不利於己聞昉譯已行此詔心甚悅之後知其父有異圖意頗不平形於言色及行禪代憤惋逾甚文帝旣不能譴責內甚愧之開皇六年封后爲樂平公主後又議奪其志后誓不許乃止大業五年從煬帝幸張掖殂於河西年四十九

蘭陵公主 下嫁王奉孝 又嫁柳述

按隋書列女傳蘭陵公主字阿五高祖第五女也美姿儀性婉順好讀書高祖於諸女中特所鍾愛初嫁儀同王奉孝卒適河東柳述時年十八諸姊並驕倨主獨折節遵於婦道事舅姑甚謹遇有疾病必親奉湯藥高祖聞之大悅由是述漸見寵遇初晉王廣欲以主配其妃弟蕭瑒高祖初許之後

遂適述晉王因不悅及述用事彌惡之高祖既崩述徙嶺表煬帝令主與述離絕將改嫁之公主以死自誓不復朝謁上表請免主號與述同徙帝大怒曰天下豈無男子欲與述同徙耶主曰先帝以妾適於柳家今其有罪妾當從坐不願陛下屈法申恩帝不從主憂憤而卒時年三十二臨終上表曰昔共姜自誓著美前詩卹嫺不言傳芳往誥妾雖負罪竊慕古人生既不得從夫死乞葬於柳氏帝覽之愈怒竟不哭乃葬主於洪瀆川資送甚薄朝野傷之 按王誼傳高祖以誼前代舊臣甚加禮敬遣使勞問冠蓋不絕以第五女妻其子奉孝尋拜大司徒誼自以與高祖有舊亦歸心焉未幾其子奉孝卒踰年誼上表言公主少請除服御史大夫楊素劾誼曰臣聞喪服有五親疎異節喪制有四降殺殊文王者之所常行故曰不易之道也是以賢者不得踰不肖者不得不及而儀同王奉孝既尙蘭陵公主奉孝以去年五月身喪始經一周而誼便請除釋竊以雖曰王姬終成下嫁之禮公則主之猶在移天之義況復三年之喪自上達下及尋釋服在禮未詳然夫婦則人倫攸始喪紀則人道至大苟不重之取笑君子故鑽燧改火責以居喪之速朝祥暮歌譏以忘哀之早然誼雖不自彊爵位已重欲爲無禮其可得乎乃薄俗傷教爲父則不慈輕禮易喪致婦於無義若縱而不正

恐傷風俗請付法推科有詔勿治 按柳機傳機子述字業隆性明敏有幹略頗涉文藝少以父蔭爲太子親衛後以尙主之故拜開府儀同三司內史侍郎上於諸壻中特所寵敬歲餘判兵部尙書事丁父艱去職未幾起攝給事黃門侍郎事襲爵建安郡公仁壽中判吏部尙書事述雖職務修理爲當時所稱然不達大體暴於馭下又怙寵驕豪無所降屈楊素時稱貴倖朝臣莫不讐憚述每陵侮之數於上前面折素短判事有不合素意素或令述改之輒謂將命者曰語僕射道尙書不肯素由是銜之俄而楊素亦被疎忌不知省務述任寄踰重拜兵部尙書參掌機密述自以無功可紀過叨匪服抗表陳讓上許之令攝兵部尙書上於仁壽宮寢疾述與楊素黃門侍郎元巖等侍疾宮中時皇太子無禮於陳貴人上知而大怒因令述召房陵王述與元巖出外作勅書楊素聞之與皇太子協謀便矯詔執述巖二人持以屬吏及煬帝嗣位述竟坐除名與公主離絕徙述於龍川郡公主請與述同徙帝不聽事見列女傳述在龍川數年復徙寧越遇瘴癘而死時年三十九 按韋鼎傳蘭陵公主寡上爲之求夫選親衛柳述及蕭瑒等以示於鼎鼎曰瑒當封侯而無貴妻之相述亦通顯而守位不終上曰位由我耳遂以主降述

廣平公主 下嫁宇文靜禮

按隋書宇文慶傳慶子靜禮初爲太子千牛備身尋尙高祖女廣平公主授儀同安德縣公邑千五百戶後爲熊州刺史先慶卒

襄國公主 下嫁李長稚

按隋書李衍傳衍弟子長稚尙高祖女襄國公主襲父綸爵爲河陽郡公開皇初拜將軍散騎常侍歷內史侍郎河州刺史檢校秦州總管

南陽公主 下嫁宇文士及

按隋書列女傳南陽公主者煬帝之長女也美風儀有志節造次必以禮年十四嫁於許國公宇文述子士及以謹肅聞及述病且卒主親調飲食手自奉上世以此稱之及宇文弒逆主隨至聊城而化及爲竇建德所敗士及自濟北西歸大唐時隋代衣冠並在其所建德引見之莫不惶懼失常唯主神色自若建德與語主自陳國破家亡不能報怨雪恥淚下盈襟聲辭不輟情理切至建德及觀聽者莫不爲之動容隕涕咸肅然敬異焉及建德誅化及時主有一子名禪師年且十歲建德

遣武賁郎將於士澄謂主曰字文化及躬行弑逆人神所不容今將族滅其家公主之子法當從坐若不能割愛亦聽留之主泣曰武賁既是隋室貴臣此事何須見問建德竟殺之主尋請建德削髮爲尼及建德敗將歸西京復與士及遇於東都之下主不與相見士及就之立於戶外請復爲夫妻主拒之曰我與君讎家今恨不能手刃君者但謀逆之日察君不預知耳因與告絕詞令速去士及固請之主怒曰必欲就死可相見也士及見其言切知不可屈乃拜辭而去 按唐書宇文士及傳士及字仁人京兆長安人父述爲隋右衛大將軍開皇末以述勳封新城縣公文帝引入臥內與語奇之詔尙煬帝女南陽公主爲尙輦奉御從幸江都以父喪免起爲鴻臚少卿其兄化及謀弑逆以主壻忌之弗告已弑帝乃封蜀王

唐一 同安公主 下嫁王裕

按唐書公主列傳世祖一女同安公主高祖同母媚也下嫁隋州刺史王裕貞觀時以屬尊進大長公主嘗有疾太宗躬省視賜縑五百姆侍皆有賚予永徽初賜實戶三百薨年八十六裕隋司徒東之子終開府儀同三司 按王方翼傳方翼并州祁人祖裕隋州刺史尙同安大長公主官開府儀

古今圖書集成
同三司卒諡曰文方翼早孤哀毀如成人時號孝童母李爲主所斥居鳳泉墅方翼尙幼雜庸保執業不棄日墾田植樹治林垣塹完牆屋煥松丸墨爲富家主薨還京師

長沙公主 下嫁馮少師

按唐書公主列傳高祖十九女長沙公主下嫁馮少師

襄陽公主 下嫁竇誕

按唐書公主列傳襄陽公主下嫁竇誕 按竇威傳威從兄子抗抗子誕隨末起家朝請郎義寧初辟丞相府祭酒封安豐郡公尙襄陽公主從秦王征薛舉爲元帥府司馬累遷太常卿高祖諸子幼未出宮者十餘王國司家事皆誕主之出爲梁州都督貞觀初召授右領軍大將軍進萃國公爲宗正卿太宗與語昏謬失對乃下詔曰誕比衰耗不能事朕知而任之是謂不明且爲官擇人者治爲人擇官者亂其以光祿大夫罷就第卒贈工部尙書荊州刺史諡曰安

平陽昭公主 下嫁柴紹

按唐書公主列傳平陽昭公主太穆皇后所生下嫁柴紹初高祖兵興主居長安紹曰尊公將以兵

清京師我欲往恐不能偕奈何主曰公行矣我自爲計紹詭道走并州主奔鄆發家貲招南山亡命得數百人以應帝於是名賊何潘仁璧司竹圍殺行人稱總管主遣家奴馬三寶喻降之共攻鄆別部賊李仲文向善志丘師利等各持所領會戲下因略地盤屋武功始平下之乃申法誓衆禁剽奪遠近咸附勒兵七萬威振關中帝渡河紹以數百騎並南山來迎主引精兵萬人與秦王會渭北紹及主對置幕府分定京師號娘子軍帝卽位以功給資不涯武德六年薨葬加前後部羽葆鼓吹大路麾幢虎賁甲卒班劍太常議婦人葬古無鼓吹帝不從曰鼓吹軍樂也往者主身執金鼓參佐命於古有邪宜用之按柴紹傳紹字嗣昌晉州臨汾人幼趨悍有武力以任俠聞補隋太子千牛備

身高祖妻以平陽公主將起兵紹走間道迎謁時太子建成齊王元吉亦自河東往遇諸塗建成曰追書急恐吏逮捕請依劇賊冀自全紹曰不可賊知君唐公子必執以爲功徒死爾不如疾走太原旣入雀鼠谷聞義兵起謂紹有謀乃相賀授右領軍大都督府長史領穀騎發晉陽先抵霍邑城下覘形勢還白宋老生一夫敵我兵到必出戰可搆也大師至老生果出紹力戰有功從下臨汾絳郡隋將桑顯和來戰紹引軍緣其背與史大柰合攻之顯和敗遂平京師進右光祿大夫封臨汾郡公

高祖卽位拜左翊衛大將軍累從征討以功進封霍國公遷右驍衛大將軍吐谷渾黨項寇邊勅紹討之鹵據高射紹軍雨矢失色紹安坐遣人彈胡琵琶使一女子舞鹵疑之休射觀紹伺其懈以精騎從後掩擊鹵大潰斬首五百級貞觀二年平梁師都轉左衛大將軍出爲華州刺史加鎮京大將軍徙譙國旣病太宗親問之卒贈荊州都督諡曰襄二子哲威令武哲威爲左屯衛將軍襲封坐弟謀反免死流邵州起爲交州都督卒

高密公主 下嫁長孫孝政 又嫁段綸

按唐書公主列傳高密公主下嫁長孫孝政又嫁段綸綸隨兵部尙書文振子爲工部尙書杞國公永徽六年主薨遺命吾葬必令墓東向以望獻陵冀不忘孝也 按隋書段文振傳文振次子綸少以俠氣聞

長廣公主 下嫁趙慈景 又嫁楊師道

按唐書公主列傳長廣公主始封桂陽下嫁趙慈景慈景隴西人帝美其姿制故妻之帝起兵或勸亡去對曰母以我爲命且安往吏捕繫於獄帝平京師引拜開化郡公爲相國府文學進兵部侍郎

爲華州刺史討堯君素戰死贈秦州刺史諡曰忠公主更嫁楊師道聰悟有思工爲詩豪侈自肆晚稍折節以壽薨

按冊府元龜唐趙慈景番州總管納之子也幼有姿儀美風調高祖潛龍時見而悅之妻以桂陽公主及長有文武才幹好結交座客常滿接對忘疲弱冠得美名於京邑高祖於諸壻中特所親愛

按舊唐書楊恭仁傳恭仁少弟師道隋末自洛陽歸國授上儀同爲備身左右尋尙桂陽公主超拜吏部侍郎累轉太常卿封安德郡公貞觀七年代魏徵爲侍中性周慎謹密未嘗漏洩內事親友或問禁中之言乃更對以他語嘗曰吾少窺漢史至孔光不言溫室之事每飲其餘風所庶幾也師道退朝後必引當時英俊宴集團池而文會之盛當時莫比雅善篇什又工草隸酣賞之際援筆直書有如宿構太宗每見師道所製必吟諷嗟賞之十二年轉中書令太子承乾逆謀事洩與長孫無忌房元齡同按其獄師道妻前夫之子趙節與承乾通謀師道微諷太宗冀活之由是獲譴罷知機密轉吏部尙書師道貴家子四海人物未能委練所署用多非其才而深抑貴勢及其親黨以避嫌疑時論譏之太宗嘗從容謂侍臣曰楊師道性行純善自無愆過而情實怯懦未甚更事緩急不可得力未幾從征高麗攝中書令及軍還有毀之者稍貶爲工部尙書尋轉太常

卿二十一年卒贈吏部尚書并州都督陪葬昭陵賜東園祕器并爲立碑

房陵公主 下嫁竇奉節 又嫁賀蘭僧伽

按唐書公主列傳房陵公主始封永嘉下嫁竇奉節又嫁賀蘭僧伽 按竇威傳威兄子軌軌子奉節尚永嘉公主歷左衛將軍秦州都督

九江公主 下嫁執失思力

按唐書公主列傳九江公主下嫁執失思力 按執失思力傳思力突厥酋長也貞觀中護送隋蕭后入朝授左領軍將軍會頡利敗太宗令思力諭降渾斛薩部落稍親近帝逐兔苑中思力諫曰陛下爲四海父母乃自輕臣竊殆之帝異其言後復逐鹿思力脫巾帶固諫帝爲止及討遼東詔思力屯金山道領突厥杆薛延陀延陀兵十萬寇河南思力示羸不與确賊深入至夏州乃整陣擊之追躡六百里會毗伽可汗死耀兵磧北而歸復從江夏王道宗破延陀餘衆與平吐谷渾詔尚九江公主拜駙馬都尉封安國公坐交房遣愛高宗以其戰多赦不誅流嶺州主請削封邑偕往主前卒龍朔中以思力爲歸州刺史卒麟德元年復公主封邑贈思力勝州都督諡曰景

廬江公主 下嫁喬師望

按唐書公主列傳廬江公主下嫁喬師望爲同州刺史

南昌公主 下嫁蘇勗

按唐書公主列傳南昌公主下嫁蘇勗

按舊唐書蘇瓌傳勗武德中爲秦王府文學館學士貞

觀中尙南康公主拜駙馬都尉累遷魏王泰府司馬勗既博學有美名甚爲泰所重因勸泰請開文學館引才名之士撰括地志後歷吏部郎太子左庶子卒

安平公主 下嫁楊思敬

按唐書公主列傳安平公主下嫁楊思敬

按舊唐書楊恭仁傳恭仁子思訓襲爵顯慶中歷右

屯衛將軍時右衛大將軍慕容寶節有愛妾置於別宅嘗邀思訓就之宴樂思訓深責寶節與其妻隔絕妾等怒密以毒藥置酒中思訓飲盡便死寶節坐是配流嶺表思訓妻又詣闕稱冤制遣使就斬之仍改賊盜律以毒藥殺人之科更從重法

淮南公主 下嫁封道言

按唐書公主列傳淮南公主下嫁封道言 按封倫傳倫子道言尙淮南長公主官至宋州刺史

眞定公主 下嫁崔恭禮

按唐書公主列傳眞定公主下嫁崔恭禮

衡陽公主 下嫁阿史那社尒

按唐書公主列傳衡陽公主下嫁阿史那社尒 按阿史那社尒傳社尒突厥處羅可汗之次子年十一以智勇聞拜拓設建牙磧北與頡利子欲谷設分統鐵勒回紇僕骨同羅諸部處羅卒哀毀如禮治衆十年無課斂或勸厚賦以自奉答曰部落豐餘於我足矣故首領咸愛之頡利數用兵社尒諫弗納貞觀元年鐵勒回紇薛延陀等叛敗欲谷設於馬獵山社尒助擊之弗勝明年將餘衆西保可汗浮圖城會頡利滅西突厥統葉護又死奚利必咄陸可汗與泥孰爭國社尒引兵襲之得其半國有衆十餘萬乃自號都布可汗謂諸部曰始爲亂破吾國者延陀也今我據西方而不平延陀是忘先可汗非孝也事脫不勝死無恨曾長皆曰我新得西方須留撫定今直棄之遠擊延陀延陀未擒葉護子孫將復吾國社尒不從選騎五萬討延陀磧北連兵十旬士苦其久稍潰去延陀縱擊大

敗之乃走保高昌衆纔萬人又與西突厥不平由是率衆內屬十年入朝授左驍衛大將軍處其部于靈州詔尙衡陽長公主爲駙馬都尉典衛屯兵十四年以交河道行軍總管平高昌諸將咸受賞社尒以未奉詔秋毫不敢取見別詔然後受又所取皆老弱陳弊太宗美其廉賜高昌寶鈿刀雜彩千段詔檢校北門左屯營封畢國公從征遼東中流矢擐去復戰所部奮厲皆有功還擢兼鴻臚卿二十一年以昆丘道行軍大總管與契苾何力郭孝恪楊弘禮李海岸等五將軍發鐵勒十三部及突厥騎十萬討龜茲師次西突厥擊處密處真敗之入自焉耆西兵出不意龜茲震恐進屯磧石伊州刺史韓威以千騎先進右驍衛將軍曹繼叔次之至多褐城其王率衆五萬拒戰威佯卻王悉兵逐北威與繼叔合殊死戰大破之社尒因拔都城王輕騎遁社尒留孝恪守自率精騎追躡行六百里王據大撥換城嬰險自固社尒攻凡四十日入之擒其王并下五大城遣左衛郎將權祇甫徇諸酋長示禍福降者七十餘城宣諭威信莫不歡服刻石紀功而還因說于闐王入朝王獻馬畜三百餉軍西突厥焉耆安國皆爭犒師孝恪之在軍牀帷器用多飾金玉以遺社尒社尒不受帝聞曰二將優劣不復問人矣帝崩請以身殉衛陵寢高宗不許遷右衛大將軍永徽六年卒贈輔國大將軍

并州都督陪葬昭陵治冢象慈山諡曰元子道真歷左屯衛大將軍咸亨初爲邏娑道副大總管與薛仁貴討吐蕃以援吐谷渾爲論欽陵所敗盡失其兵詔有司問狀免死爲民

丹陽公主 下嫁薛萬徹

按唐書公主列傳丹陽公主下嫁薛萬徹萬徹忤甚主不與同席太宗爲置酒與萬徹握槊解所佩刀賜之主喜命同載以歸 按薛萬均傳萬均弟萬徹與萬均歸高祖授車騎將軍武安縣公事隱太子太子誅萬徹督宮兵戰元武門譟而趨秦府衆失色乃示以太子首然後去與數十騎亡之南山秦王數使賁論乃出謝王以其忠於所事不之罪也從李靖討突厥頡利可汗以功授統軍進爵郡公歷右衛將軍蒲州刺史副李勣擊薛延陀鹵戰磧南率數百騎爲先鋒繞擊陣後鹵顧見遂潰斬首三千級馬萬五千封一子爲縣侯改左衛將軍尙丹陽公主加駙馬都尉遷代州都督右武衛大將軍太宗嘗曰當今名將唯李勣江夏王道宗萬徹而已勣道宗雖不能大勝亦未嘗大敗至萬徹非大勝卽大敗矣貞觀二十二年以青丘道行軍總管帥師三萬伐高麗次鴨渌水以奇兵襲大行城與高麗步騎萬餘戰斬鹵將所夫孫鹵皆震恐遂傳泊沟城鹵衆三萬來援擊走之拔其城萬